

OČISTIMO SRCA NAŠA!

Neka je hvala Allahu, dž.š., Gospodaru svih svjetova. Neka su salavat i selam na Poslanika Muhammeda, s.a.v.s., njegovu časnu porodicu, ashabe i sve sljedbenike, koji čiste svoja srca i pripremaju ih za susret sa Gospodarom.

Braćo moja u Dini Islamu! Jedna od najvažnijih stvari, kojoj čovjek treba da stremi, jeste čistoća srca. Kada u suri Eš-Šu'ara (87-89.) Ibrahim, a.s., doziva svoga Gospodara, on kaže: **"Nemoj me osramotiti na Dan proživljenja! Na Dan kada ni imetak ni sinovi od koristi neće biti. Osim onome ko Allahu sa zdravim srcem dođe."** Samo čisto srce je zdravo srce. Kako to i Poslanik, s.a.v.s., u hadisu spominje: **"Zaista u čovjekovom tijelu ima jedan organ, koji ako je zdrav zdravo je i cijelo tijelo, a ako je on bolestan bolesno je i cijelo tijelo. Taj organ je srce."** (Muttefekun alejhi)

Srce se prlja grijesima. Kad god čovjek učini loše djelo, na njegovom srcu se pojavi mrlja. Pa kada učini novi grijeh, mrlja se poveća i tako redom sve dok se srce u potpunosti ne zaprlja i na taj način postane nemarno i bezosjećajno, tj. bolesno. Ali, kao što za svaku bolest ima lijek, tako ima i za srce, a to su dobra djela. Ona poništavaju djeinstvo loših djela, unose svjetlost u čovjekovo srce i brišu nastale mrlje. Sve to je popraćeno Allahovim oprostom, čime se srce oslobađa okova i biva jako i slobodno, tj. zdravo.

Mnogo je djela koja pomažu čovjeku da očisti svoje srce i osjeti ljepotu života i imana. Među njima se posebno ističu: redovno obavljanje namaza, stalno učenje probranih zikrova, redovno klanjanje džume, davanje sadake (posebno trajne), ustrajnost u traženju oprosta, post mjeseca ramazana, Dana Arefata i Dana Ašure, te obavljanje hadža i umre.

Ovo posljednje spomenuto djelo je jedno od najljepših. Ko god želi da odmori svoje oči, nahrani svoju dušu, napoji svoje srce, posjeti najljepša mjesta na Dunjaluku, da se tom prilikom očisti od grijeha i dođe kući bolji i zdraviji nego što je otišao, neka obavi umru! Neka posjeti i poselami Poslanika, s.a.v.s., i prohoda stazama kojima je on hodio, neka posjeti svoga Gospodara u Njegovoj časnoj kući, neka uživa u tragovima prošlosti i gostoprimstvu Najgostoprimljivijeg Domaćina. Tek kada to učini, moći će u potpunosti da shvati poruku one arapske poslovice, koja kaže: "Čisto srce u svemu vidi lijepo."

Braćo moja! Slijedećeg četvrtka se obilježava tradicionalna mubarek-noć Lejletul-Mi'radž, u kojoj ćemo se još jednom prisjetiti najvažnijeg događaja u životu Muhammeda, s.a.v.s., a to je putovanje na Isra' i Mi'radž. Isra' je njegovo putovanje na Buraku od Ka'be do džamije El-Aksa, a Mi'radž je putovanje sa melekom Džibrilom kroz nebesa, te prelazak granice Sidretul-munteha, nakon čega je uslijedio njegov susret i razgovor sa Uzvišenim Gospodarom. Na taj događaj nas podsjeća svako učenje Ettehijjatu u namazu, samo što mi o tome možda često i ne razmišljamo.

Prisjetimo se da je jedna od najvećih poruka Mi'radža i naredbi od Uzvišenog Gospodara – NAMAZ. Namaz je naša najjača veza sa Gospodarom i zato ni u kom slučaju nemojmo sebi dozvoliti da budemo od onih koji su lijeni, kojima je svejedno za namaz i koji ga ne klanjaju redovno (ili, ne daj Bože, nikako). Prisjetimo se da će prvo pitanje svakome od nas na Sudnjem danu biti da li smo redovno klanjali namaz. Prisjetimo se da je u posljednjim trenucima svog života Muhammed, s.a.v.s., plakao i svome Ummetu poručio i ponavljao: "**Namaz, namaz...**!" Prisjetimo se ashaba po imenu Rebi'a b. Ka'b el-Eslemi, koji reče Poslaniku, s.a.v.s., da želi sa njim da bude u Džennetu, pa mu Poslanik, s.a.v.s., reče: "**Pomozi mi (da ti ispunim želju) tako što ćeš često sedždu činiti!**" (Muslim)

Braćo moja, ako volimo svoga Gospodara, onda činimo ono što On najviše voli, a to je namaz u njegovo vrijeme! Ako ga zbog obaveza ne možemo navrijeme klanjati, onda ga što prije nadoknadimo (naklanjajmo)! Ako zaista volimo svoga Gospodara, onda ćemo voljeti i namaz, a ono što volimo ne može biti teško i u njegovom obavljanju se nikada ne možemo umoriti. Čak šta više, namaz je sredstvo za odmaranje tijela i duše. A ako tvrdimo da volimo Gospodara, a pri tome ne volimo namaz, onda mi ne govorimo istinu, nismo iskreni i u sebi imamo jednu od odlika licemjera, pa se potrudimo da je od sebe odstranimo. Jer licemjerovo srce je bolesno srce.

Braćo moja, ako želimo da uživamo u blagodatima mjeseca ramazana, da punim srcem osjetimo njegovu ljepotu i da se ta ljepota preslika na naše međusobne odnose, onda se potrudimo da svoja srca što više očistimo prije početka mjeseca ramazana. Do tada imamo još nekih 40-ak dana i zato nemojmo gubiti vrijeme. I pri tome dobro znajmo da će se prokleti šejtan isto toliko, ili čak i više, potruditi da naša srca zaprlja i da što više pokvari naše međusobne odnose. Zato, pamet u glavu! Nije do prokletog šejtana. Do nas je! Samo do nas.

U četvrtak poslije jaciye-namaza proučit ćemo, akobogda, zikr i zatražiti oprost od našeg Gospodara. A do tada savjetujem sebi i vama da sebi uvedemo u naviku da svako jutro kad osvanemo i svaku večer prije nego što zaspimo proučimo Sejjidul-istigfar (Allahumme Ente Rabbi...) U hadisu kojeg bilježi Buharija Poslanik, s.a.v.s., je rekao da onaj ko prouči Sejjidul-istigfar ujutro, čvrsto vjerujući u njegove riječi, pa umre prije nego što omrkne – bit će stanovnik Dženneta. Isto tako, ko ga prouči navečer, čvrsto vjerujući u njegove riječi, pa umre prije nego što osvane – bit će stanovnik Dženneta.

Na kraju, molim Dragog Allaha da nam osvijetli puteve koji vode ka Njegovom zadovoljstvu, rahmetu i Džennetu. Amin.